



www.bb.org.bd

এসএমই এন্ড স্পেশাল প্রোগ্রামস বিভাগ

বাংলাদেশ ব্যাংক

প্রধান কার্যালয়, ঢাকা

ডাকবাক্স নং-৩২৫

এসএমইএসপিডি সার্কুলার নং: ২

তারিখ: ২৪ আশ্বিন ১৪২১
৯ অক্টোবর ২০১৪

ব্যবস্থাপনা পরিচালক/নির্বাহী প্রধান

বাংলাদেশের সকল তফসিলি ইসলামী ব্যাংক ও আর্থিক প্রতিষ্ঠান
প্রধান কার্যালয়

প্রিয় মহোদয়

‘কৃষিভিত্তিক শিল্প’, ‘ক্ষুদ্র উদ্যোক্তা (নারী উদ্যোক্তাসহ)’ এবং ‘কুটির, মাইক্রো ও ক্ষুদ্র খাতে নতুন উদ্যোক্তা’ খাতে ইসলামী শরিয়াহ্ ভিত্তিক অর্থায়নের বিপরীতে পুনঃঅর্থায়ন তহবিল গঠন প্রসঙ্গে

দেশের গ্রামাঞ্চলে কর্মসংস্থান সৃষ্টি ও দারিদ্র বিমোচনের লক্ষ্যে কৃষিভিত্তিক শিল্প স্থাপন, ক্ষুদ্র খাতে অর্থায়ন বৃদ্ধি ও নতুন উদ্যোক্তা সৃষ্টির মাধ্যমে দেশের শিল্প উন্নয়নকে সুসম ও সংগঠিত করতে বাংলাদেশ ব্যাংক তফসিলি ব্যাংক ও আর্থিক প্রতিষ্ঠানসমূহকে অর্থায়নযোগ্য খাতে পুনঃঅর্থায়ন সুবিধা প্রদান করে আসছে। অর্থনৈতিক কর্মকাণ্ডে গতিশীলতা আনয়নের উদ্দেশ্যে এবং শিল্পায়নে বিশেষ করে কৃষিজাত পণ্য প্রক্রিয়াজাতকরণ, ক্ষুদ্র উদ্যোক্তা খাত এবং নতুন উদ্যোক্তাগণকে অর্থায়নে ইসলামী ব্যাংক ও আর্থিক প্রতিষ্ঠানসমূহের সম্পৃক্ততা বৃদ্ধিকল্পে ব্যাংকিং প্রবিধি ও নীতি বিভাগের ১৮/০৯/২০১৪ তারিখের বিআরপিডি সার্কুলার নং-১৩ এর মাধ্যমে বাংলাদেশ ব্যাংকে একটি পুনঃঅর্থায়ন তহবিল গঠন করা হয়েছে। উক্ত তহবিলের আওতায় ‘কৃষিভিত্তিক শিল্প’ এবং ‘ক্ষুদ্র উদ্যোক্তা (নারী উদ্যোক্তাসহ)’ এবং ‘কুটির, মাইক্রো ও ক্ষুদ্র খাতে নতুন উদ্যোক্তা’ খাতে অর্থায়নের বিপরীতে পুনঃঅর্থায়ন সুবিধা প্রদান করা হবে। উল্লিখিত তহবিলের অধীনে ইসলামী শরিয়াহ্ মোতাবেক পরিচালিত ব্যাংক ও আর্থিক প্রতিষ্ঠানসমূহ নিম্নোক্ত শর্তে অর্থায়নের বিপরীতে পুনঃঅর্থায়ন সুবিধা গ্রহণ করতে পারবে:

১। সাধারণ নিয়মাবলী

- ১.১ পুনঃঅর্থায়ন সুবিধা গ্রহণে আগ্রহী ইসলামী শরিয়াহ্ ভিত্তিতে পরিচালিত ব্যাংক ও আর্থিক প্রতিষ্ঠানসমূহকে এসএমই এন্ড স্পেশাল প্রোগ্রামস বিভাগ, বাংলাদেশ ব্যাংক, প্রধান কার্যালয়ের সাথে একটি অংশগ্রহণ চুক্তি (Participation Agreement) সম্পাদন করতে হবে।
- ১.২ এ তহবিলের আওতায় অংশগ্রহণকারী প্রতিষ্ঠানসমূহ (Participating Financial Institution (PFI)) কর্তৃক গৃহীত পুনঃঅর্থায়ন যোগানের উপর সংশ্লিষ্ট অংশগ্রহণকারী প্রতিষ্ঠানের মুদারাবা সঞ্চয়ী হিসাবের বিদ্যমান মুনাফার হার অথবা সময়ে সময়ে বিদ্যমান ব্যাংক হারের মধ্যে যেটি কম সে হারে মুনাফা/মার্কআপ প্রদেয় হবে।
- ১.৩ পুনঃঅর্থায়ন সুবিধা প্রাপ্তিতে আগ্রহী সকল অংশগ্রহণকারী প্রতিষ্ঠানকে নিম্নোক্ত শর্তাবলী যথাযথভাবে পূরণ করতে হবে:
 - (ক) শ্রেণীবিন্যাসিত বিনিয়োগের হার ১০% এর নিচে থাকতে হবে;
 - (খ) বাংলাদেশ ব্যাংক কর্তৃক নির্ধারিত হারে মূলধন পর্যাণ্ডতা থাকতে হবে;
 - (গ) একক গ্রাহক বা গোষ্ঠীর ক্ষেত্রে বিনিয়োগ সুবিধার সর্বোচ্চ সীমা (Single Borrower Exposure Limit) সংক্রান্ত নীতিমালা যথাযথভাবে অনুসরণ করতে হবে;
 - (ঘ) যথাযথ ঝুঁকি ব্যবস্থাপনা (Risk Management) ও অর্থ পাচার (Money Laundering) প্রতিরোধ সংক্রান্ত বিধি-বিধানের পরিপালন নিশ্চিত করতে হবে।
- ১.৪ পুনঃঅর্থায়ন সুবিধা প্রাপ্তির জন্য সকল অংশগ্রহণকারী প্রতিষ্ঠানকে বাংলাদেশ ব্যাংক কর্তৃক জারিকৃত “Guidelines for Islamic Banking”, “Prudential Regulations for Banks” ও “Prudential Regulations for Financial Institutions” এবং অন্যান্য প্রযোজ্য নীতিমালা যথাযথভাবে পালন করতে হবে।

- ১.৫ বিনিয়োগ গ্রহীতা নির্বাচন, বিনিয়োগ মঞ্জুরি, বিতরণ, দলিল সম্পাদন, ডেট-ইকুইটি অনুপাত, মার্জিন, বিনিয়োগের বিপরীতে বীমাকরণ, বিনিয়োগের সদ্যবহার ও তদারকির ব্যাপারে বিনিয়োগ প্রদানকারী ইসলামী ব্যাংকসমূহের নিজস্ব বিধি-বিধান, শরীয়াহ নীতিমালা ও ব্যাংকার-গ্রাহক সম্পর্কের ভিত্তিতে নির্ধারিত হবে। বিতরণকৃত বিনিয়োগ আদায়ের সকল দায়-দায়িত্ব বিনিয়োগকারী অংশগ্রহণকারী প্রতিষ্ঠানের উপর ন্যস্ত থাকবে।
- ১.৬ অংশগ্রহণকারী প্রতিষ্ঠান বিনিয়োগ অনুমোদনের কপি, গ্রাহক কর্তৃক প্রদত্ত Acceptance Letter ও অন্যান্য প্রয়োজনীয় কাগজপত্রসহ মাসিক ভিত্তিতে অনুমোদিত বিনিয়োগের বিপরীতে তহবিল সহায়তার জন্য বাংলাদেশ ব্যাংকে আবেদন করতে পারবে। প্রতি মাস শেষে পরবর্তী ১৫ দিনের মধ্যে বাংলাদেশ ব্যাংকে পুনঃঅর্থায়ন বরাদ্দের জন্য আবেদন দাখিল করতে হবে। তবে শর্ত থাকে যে, পুনঃঅর্থায়ন সুবিধা গ্রহণের জন্য বাংলাদেশ ব্যাংকে আবেদনের তারিখ থেকে ৬০ দিন পূর্বে প্রদত্ত বিনিয়োগ পুনঃঅর্থায়ন সুবিধা বরাদ্দের জন্য বিবেচনা করা হবে না।
- ১.৭ আলোচ্য পুনঃঅর্থায়ন সুবিধা গ্রহণে ইচ্ছুক অংশগ্রহণকারী প্রতিষ্ঠানসমূহকে পুনঃঅর্থায়ন সুবিধা গ্রহণের প্রাক্কালে প্রতিটি ক্ষেত্রে প্রতিশ্রুতিপত্র (Demand Promissory Note) প্রদান করতে হবে।
- ১.৮ ফেরতসূচি অনুযায়ী মুনাফাসহ পুনঃঅর্থায়ন বাবদ প্রদত্ত অর্থের কিস্তি নির্ধারিত তারিখে বাংলাদেশ ব্যাংকের মতিবিল অফিসে রক্ষিত সংশ্লিষ্ট অংশগ্রহণকারী প্রতিষ্ঠানসমূহের চলতি হিসাব থেকে কর্তন করে নেয়া হবে।
- ১.৯ পুনঃঅর্থায়ন সুবিধা বাবদ গৃহীত অর্থের সদ্যবহার সম্পর্কে বাংলাদেশ ব্যাংকের চাহিদা মোতাবেক সময়ে সময়ে প্রয়োজনীয় তথ্য/বিবরণী অংশগ্রহণকারী প্রতিষ্ঠানসমূহ সংরক্ষণ ও সরবরাহ করবে।
- ১.১০ ভুল তথ্য প্রদানের মাধ্যমে কোন অংশগ্রহণকারী প্রতিষ্ঠান আলোচ্য তহবিলের আওতায় পুনঃঅর্থায়ন সুবিধা গ্রহণ করলে উক্ত রূপে গৃহীত অর্থ মুদারাবা সঞ্চয়ী হিসাবের প্রচলিত মুনাফার দ্বিগুণ হারে মুনাফাসহ বাংলাদেশ ব্যাংকের মতিবিল অফিসে রক্ষিত সংশ্লিষ্ট অংশগ্রহণকারী প্রতিষ্ঠানের চলতি হিসাব বিকলনপূর্বক এককালীন ফেরত নেয়া হবে।
- ১.১১ আলোচ্য পুনঃঅর্থায়ন সুবিধাসমূহ অত্র সার্কুলার জারির পরে অনুমোদিত বিনিয়োগের ক্ষেত্রেই কেবলমাত্র প্রযোজ্য হবে।
- ১.১২ আলোচ্য তহবিলের আওতায় পুনঃঅর্থায়ন সুবিধা গ্রহণে আগ্রহী ইসলামী ব্যাংক ও আর্থিক প্রতিষ্ঠানসমূহকে এ মর্মে আবশ্যিক চুক্তিপত্র, প্রতিশ্রুতিপত্র ও তহবিল সহায়তা গ্রহণের আবেদনপত্র ইত্যাদির নমুনা বাংলাদেশ ব্যাংকের এসএমই এন্ড স্পেশাল প্রোগ্রামস বিভাগ থেকে সংগ্রহ করতে হবে।
- ২। **কৃষিভিত্তিক শিল্পে অর্থায়নের শর্তাবলী**
- ২.১ এ তহবিলের আওতায় অংশগ্রহণকারী প্রতিষ্ঠান কর্তৃক বিনিয়োগের বিপরীতে ১০০% তহবিল সুবিধা প্রদান করা হবে।
- ২.২ কৃষিভিত্তিক শিল্প প্রতিষ্ঠানটিকে বিভাগীয় সদর ও নারায়নগঞ্জ শহরের বাইরে অবস্থিত হতে হবে।
- ২.৩ কৃষিভিত্তিক শিল্প প্রতিষ্ঠানটি অর্থায়ন পূর্ববর্তী বিদ্যমান স্থায়ী সম্পদের (ভূমি ও ইমারত ব্যতীত) পরিমাণ ১০ কোটি টাকা বা এর কম হতে হবে।
- ২.৪ এ তহবিলের আওতায় তহবিল সুবিধা চলতি মূলধন, মধ্যম মেয়াদি ও দীর্ঘ মেয়াদি বিনিয়োগের ক্ষেত্রে প্রযোজ্য হবে। চলতি মূলধন বিনিয়োগের মেয়াদ ১ বৎসর, মধ্যম মেয়াদি বিনিয়োগের মেয়াদ ৩ বৎসর এবং দীর্ঘ মেয়াদি বিনিয়োগের মেয়াদ ৫ বৎসর হতে হবে।
- ২.৫ এ তহবিলের আওতায় গ্রাহক পর্যায়ে বিনিয়োগের বিপরীতে গৃহীত মুনাফার হার প্রচলিত ব্যাংক হার ও মুদারাবা সঞ্চয়ী হিসাবের গড় মুনাফার হার এর যোগফলের চেয়ে বেশি হবে না।
- ২.৬ এ তহবিলের আওতায় অংশগ্রহণকারী প্রতিষ্ঠানসমূহকে ত্রৈমাসিকভিত্তিতে পুনঃঅর্থায়ন প্রদান করা হবে যা সচল ও অশ্রেণীকৃত থাকা সাপেক্ষে মূল অর্থায়নের বিনিয়োগকাল পর্যন্ত সময়ে ত্রৈমাসিক ভিত্তিতে মুনাফাসহ পরিশোধ ও বিনিয়োগের অশ্রেণীকৃত আসল স্থিতি পুনঃউত্তোলনযোগ্য হবে।
- ২.৭ রেয়াতি সময়: হিসাবায়নের সুবিধার্থে রেয়াতি সময় ৩ এর গুণিতক হিসাবে ৩ মাস অথবা ৬ মাস সময় প্রদান করা যেতে পারে।

- ২.৮ অত্র সার্কুলারের সংযোজনী 'ক'-তে বর্ণিত কৃষিভিত্তিক শিল্পের তালিকায় বর্ণিত খাতসমূহে বিনিয়োগকৃত অর্থ এ তহবিলের আওতায় পুনঃঅর্থায়ন সুবিধা প্রদানের জন্য বিবেচিত হবে। সময়ে সময়ে এ তালিকা হালনাগাদ করা হলে হালনাগাদকৃত তালিকায় বর্ণিত শিল্প খাতসমূহ এ তহবিলের আওতায় অর্থায়নযোগ্য হবে।

৩। ক্ষুদ্র উদ্যোক্তা খাতে অর্থায়নের শর্তাবলী

- ৩.১ ১৯ জুন ২০১১ তারিখে জারিকৃত এসএমইএসপিডি সার্কুলার নং-১ এ বর্ণিত বা সময়ে সময়ে পরিমার্জিত সংজ্ঞানুসারে এ তহবিলের আওতায় শিল্প, সেবা ও ব্যবসা খাতে কুটির, মাইক্রো ও ক্ষুদ্র শিল্প উদ্যোগ বিনিয়োগের জন্য যোগ্য বিবেচিত হবে।
- ৩.২ অংশগ্রহণকারী প্রতিষ্ঠানসমূহকে তাঁদের অনুমোদিত চলতি মূলধন ও মেয়াদি বিনিয়োগের বিপরীতে একক ক্ষেত্রে ১০ হাজার টাকা থেকে সর্বোচ্চ ৫০ লক্ষ টাকা পর্যন্ত বিনিয়োগের বিপরীতে বাংলাদেশ ব্যাংক কর্তৃক সর্বোচ্চ ১০০% পুনঃঅর্থায়ন সুবিধা দেয়া হবে।
- ৩.৩ অংশগ্রহণকারী প্রতিষ্ঠানসমূহ গ্রাহক পর্যায়ে ব্যাংকার-গ্রাহক সম্পর্কের নিরিখে বিনিয়োগের উপর বাজার ভিত্তিক মুনাফা হার/মার্কআপ আরোপ করবে। তবে সামাজিক কল্যাণের বিষয়টিকে সর্বোচ্চ গুরুত্ব দিয়ে অত্র পুনঃঅর্থায়ন তহবিল এর আওতায় প্রদত্ত বিনিয়োগসমূহে গ্রাহকের নিকট হতে আদায়কৃত মুনাফার হার সর্বনিম্ন মাত্রায় রাখার প্রচেষ্টা অংশগ্রহণকারী প্রতিষ্ঠানসমূহকে অব্যাহত রাখতে হবে।
- ৩.৪ গ্রাহক নারী উদ্যোক্তা হলে অধাধিকারভিত্তিতে অত্র তহবিলের আওতায় অংশগ্রহণকারী প্রতিষ্ঠানসমূহকে পুনঃঅর্থায়ন সুবিধা প্রদান করা হবে এবং এক্ষেত্রে বিনিয়োগের মুনাফার হার/মার্কআপ প্রচলিত ব্যাংক হার ও মুদারাবা সঞ্চয়ী হিসাবের গড় মুনাফার হার এর যোগফলের চেয়ে বেশি হতে পারবে না।
- ৩.৫ ১ বছর মেয়াদি চলতি মূলধন, সর্বোচ্চ ৩ বছর পর্যন্ত মধ্যম মেয়াদি বিনিয়োগ ও সর্বোচ্চ ৫ বছর মেয়াদি দীর্ঘ মেয়াদী বিনিয়োগে এ তহবিলের আওতায় অর্থায়ন করা যাবে।
- ৩.৬ এ তহবিলের আওতায় অংশগ্রহণকারী প্রতিষ্ঠানসমূহকে ত্রৈমাসিক ভিত্তিতে পুনঃঅর্থায়ন প্রদান করা হবে যা সচল ও অশ্রেণীকৃত থাকা সাপেক্ষে মূল অর্থায়নের বিনিয়োগকাল পর্যন্ত সময়ে ত্রৈমাসিক ভিত্তিতে মুনাফাসহ পরিশোধ ও বিনিয়োগের অশ্রেণীকৃত আসল স্থিতি পুনঃউত্তোলনযোগ্য হবে।
- ৩.৭ রেয়াতি সময়: হিসাবায়নের সুবিধার্থে রেয়াতি সময় ৩ এর গুণিতক হিসাবে ৩ মাস অথবা ৬ মাস সময় প্রদান করা যেতে পারে।
- ৩.৮ কৃষি খাতে প্রদত্ত বিনিয়োগ, কনজুমার বিনিয়োগ ও ব্যক্তিগত বিনিয়োগের ক্ষেত্রে এ পুনঃঅর্থায়ন সুবিধা প্রযোজ্য হবে না।

৪। কুটির, মাইক্রো ও ক্ষুদ্র খাতে নতুন উদ্যোক্তাগণকে অর্থায়নের শর্তাবলী

৪.১ কতিপয় ধারণার সংক্ষিপ্ত ব্যাখ্যা:

- (ক) নতুন উদ্যোক্তা: এ তহবিলের আওতায় নতুন উদ্যোক্তা বলতে সেসব উদ্যোক্তাকে বোঝাবে যারা প্রস্তাবিত উদ্যোগ ব্যতীত পূর্বে অন্য কোন ব্যবসায়িক কার্যক্রমে সম্পৃক্ত ছিলেন না এবং যারা পূর্বে ব্যবসায়িক কাজে কোন প্রকার প্রাতিষ্ঠানিক অর্থায়ন/বিনিয়োগ গ্রহণ করেননি।
- (খ) সরকারি ও বেসরকারি উদ্যোক্তা উন্নয়ন প্রতিষ্ঠান: সরকারি উদ্যোক্তা উন্নয়ন প্রতিষ্ঠান বলতে এসএমই ফাউন্ডেশন, যুব উন্নয়ন অধিদপ্তর, মহিলা বিষয়ক অধিদপ্তর, বিসিক ও এ জাতীয় প্রতিষ্ঠান এবং তাঁদের কর্তৃক প্রতিষ্ঠিত বিধিবদ্ধ প্রশিক্ষণ প্রদানকারী প্রতিষ্ঠানকে বুঝাবে। অন্যদিকে, বেসরকারি উদ্যোক্তা উন্নয়ন প্রতিষ্ঠান বলতে তাঁদেরকে বুঝাবে যারা বিধিবদ্ধ আইন দ্বারা প্রতিষ্ঠিত এবং যাদের উদ্যোক্তা উন্নয়ন ও প্রশিক্ষণ পরিচালনা কার্যক্রমে সম্পৃক্ততা, দক্ষতা ও পরিচিতি রয়েছে। যেমন, ঢাকা চেম্বার অব কমার্স এন্ড ইন্ডাস্ট্রি (ডিসিসিআই), ইনস্টিটিউট অব ডিপ্লোমা ইঞ্জিনিয়ার্স বাংলাদেশ (আইডিইবি), বাংলাদেশ উইমেন চেম্বার অব কমার্স এন্ড

ইন্ডাস্ট্রি (বিডব্লিউসিসিআই), ন্যাশনাল এসোসিয়েশন অব স্মল এন্ড কন্টেজ ইন্ডাস্ট্রিজ অব বাংলাদেশ (নাসিব) কিংবা এ জাতীয় অন্যান্য প্রতিষ্ঠান।

- (গ) স্বীকৃতি: এ পুনঃঅর্থায়ন তহবিলের আওতায় উদ্যোক্তা উন্নয়ন প্রতিষ্ঠানসমূহ কর্তৃক নির্বাচিত ও প্রশিক্ষিত নতুন উদ্যোক্তা কর্তৃক পুনঃঅর্থায়ন সুবিধা গ্রহণের নিমিত্তে উদ্যোক্তা উন্নয়ন প্রতিষ্ঠানসমূহকে বাংলাদেশ ব্যাংকের এসএমই এন্ড স্পেশাল প্রোগ্রামস বিভাগ এর স্বীকৃতি (Accreditation) গ্রহণ করতে হবে। তবে, এ স্বীকৃতি (Accreditation) তাঁদের দ্বারা নির্বাচিত ও প্রশিক্ষিত নতুন উদ্যোক্তাদের অর্থায়ন/বিনিয়োগ পাওয়ার কোন নিশ্চয়তা প্রদান করবে না। ব্যাংক ও আর্থিক প্রতিষ্ঠানসমূহ তাঁদের স্বীয় অর্থায়ন/বিনিয়োগ ঝুঁকি বিবেচনায় নিয়ে ব্যাংকার-গ্রাহক সম্পর্কের ভিত্তিতে প্রচলিত বিধি-বিধান অনুযায়ী অর্থায়ন/বিনিয়োগ প্রদান করবে।

৪.২ অর্থায়নের শর্তাবলী:

- (ক) এ তহবিলের আওতায় ১৯/০৬/২০১১ তারিখে জারিকৃত এসএমইএসপিপি সার্কুলার নং-১ এ বর্ণিত সংজ্ঞানুসারে শিল্প ও সেবা খাতে কুটির, মাইক্রো ও ক্ষুদ্র শিল্প উদ্যোগ পুনঃঅর্থায়নের জন্য যোগ্য বিবেচিত হবে। তবে শর্ত থাকে যে, অত্র পুনঃঅর্থায়ন তহবিলের আওতায় সুবিধাভোগী নতুন উদ্যোক্তাকে অবশ্যই নিম্নোক্ত যোগ্যতার অধিকারী হতে হবে:

- (১) প্রস্তাবিত উদ্যোগের বিষয়ে যথাযথ কারিগরি শিক্ষা ও জ্ঞান থাকতে হবে;
- (২) বিনিয়োগ প্রস্তাব দাখিলের সময় উদ্যোক্তার বয়স ১৮ হতে ৪৫ বৎসরের মধ্যে সীমাবদ্ধ থাকতে হবে;
- (৩) প্রস্তাবিত ব্যবসা/উদ্যোগে সার্বক্ষণিক নিয়োজিত থাকতে হবে;
- (৪) বিনিয়োগ প্রস্তাবকারী নতুন উদ্যোক্তাকে বাংলাদেশ ব্যাংক কর্তৃক স্বীকৃত কোন সরকারি কিংবা বেসরকারি উদ্যোক্তা উন্নয়ন প্রতিষ্ঠান হতে উদ্যোক্তা উন্নয়ন, ব্যবসা পরিচালন, পণ্য বা সেবা বাজারজাতকরণ ইত্যাদি বিষয়ে অথবা অন্যান্য কারিগরি বিষয় (পণ্য উৎপাদন, প্রক্রিয়াজাতকরণ, যন্ত্রপাতি মেরামত ইত্যাদি) এ সাফল্যজনকভাবে প্রশিক্ষণ গ্রহণের সনদপত্র থাকতে হবে;
- (৫) উল্লিখিত (ক) হতে (গ) শর্তাবলী পূরণে সক্ষম কোন নতুন উদ্যোক্তা সরকারি কিংবা বেসরকারি উদ্যোক্তা উন্নয়ন প্রতিষ্ঠান হতে প্রশিক্ষণ গ্রহণ না করে থাকলেও অংশগ্রহণকারী প্রতিষ্ঠান তাঁর নিজস্ব ঝুঁকি ব্যবস্থাপনা কৌশলের মাধ্যমে উদ্যোক্তার বিনিয়োগ ঝুঁকি যাচাই করে অর্থায়ন/বিনিয়োগ প্রদান করলে তা অত্র তহবিলের আওতায় পুনঃঅর্থায়নযোগ্য হবে।

- (খ) অংশগ্রহণকারী প্রতিষ্ঠানসমূহ কর্তৃক অর্থায়িত চলতি মূলধন ও মেয়াদি বিনিয়োগের বিপরীতে নিম্নরূপে সর্বোচ্চ ১০০% পুনঃঅর্থায়ন সুবিধা প্রদান করা হবে:

- (১) সহায়ক জামানতবিহীন বিনিয়োগের বিপরীতে সর্বোচ্চ ১০ লক্ষ টাকা;
- (২) সহায়ক জামানতসহ বিনিয়োগের বিপরীতে সর্বোচ্চ ২৫ লক্ষ টাকা।

- (গ) সহায়ক জামানতবিহীন বিনিয়োগের ক্ষেত্রে অংশগ্রহণকারী প্রতিষ্ঠানসমূহ নতুন উদ্যোক্তা হতে ব্যক্তিগত জামানত (Personal Guarantee), ৩য় পক্ষ হতে জামানত (Third-Party Guarantee) কিংবা সামাজিক জামানত গ্রহণ করতে পারবে।

- (ঘ) নতুন উদ্যোক্তাকে মোট প্রকল্প ব্যয়ের ন্যূনতম ২০% বহন করতে হবে।

- (ঙ) এ তহবিলের আওতায় গ্রাহক পর্যায়ে বিনিয়োগের বিপরীতে গৃহীত মুনাফার হার প্রচলিত ব্যাংক হার ও মুদারাবা সঞ্চয়ী হিসাবের গড় মুনাফার হার এর যোগফলের চেয়ে বেশি হবে না।

- (চ) এ তহবিলের আওতায় অংশগ্রহণকারী প্রতিষ্ঠানসমূহকে ত্রৈমাসিক ভিত্তিতে পুনঃঅর্থায়ন প্রদান করা হবে যা সচল ও অশ্রেণীকৃত থাকা সাপেক্ষে মূল অর্থায়নের বিনিয়োগকাল পর্যন্ত সময়ে ত্রৈমাসিক ভিত্তিতে মুনাফাসহ পরিশোধ ও বিনিয়োগের অশ্রেণীকৃত আসল স্থিতি পুনঃউত্তোলনযোগ্য হবে।

- (ছ) রেয়াতি সময়: হিসাবায়নের সুবিধার্থে রেয়াতি সময় ৩ এর গুণিতক হিসাবে ৩ মাস অথবা ৬ মাস সময় প্রদান করা যেতে পারে।

৪.৩ অন্যান্য শর্তাবলী: নিম্নোক্ত উদ্যোগের বিপরীতে প্রদত্ত বিনিয়োগ পুনঃঅর্থায়ন বরাদ্দের ক্ষেত্রে অগ্রাধিকার পাবে:

- (ক) নারী উদ্যোক্তা;
- (খ) উদ্ভাবনী ও সৃজনশীল উদ্যোগ;
- (গ) আইসিটি খাত;
- (ঘ) আমদানি বিকল্প উদ্যোগ;
- (ঙ) রপ্তানিমুখী উদ্যোগ;
- (চ) কারিগরি শিক্ষায় শিক্ষিত উদ্যোক্তাদের শিক্ষা সংশ্লিষ্ট উদ্যোগ।

৪.৪ উদ্যোক্তা উন্নয়ন ও প্রশিক্ষণ পরিচালনাকারী প্রতিষ্ঠানসমূহের করণীয়:

- (ক) উদ্যোক্তা উন্নয়ন ও প্রশিক্ষণের সাথে সংশ্লিষ্ট সরকারি ও বেসরকারি প্রতিষ্ঠানসমূহকে এসএমই এন্ড স্পেশাল প্রোগ্রামস বিভাগে স্বীকৃতি (Accreditation) গ্রহণের জন্য আবেদন করতে হবে। আবেদনের সাথে নিম্নোক্ত কাগজপত্র ও দলিলাদি দাখিল করতে হবে:
 - (১) বেসরকারি প্রতিষ্ঠানের ক্ষেত্রে প্রতিষ্ঠানের নিবন্ধন ও বিগত ৩ বছরের বার্ষিক প্রতিবেদন;
 - (২) প্রতিষ্ঠানের উদ্যোক্তা উন্নয়ন কর্মসূচির বিস্তারিত বিবরণ;
 - (৩) প্রশিক্ষণ মডিউল;
 - (৪) প্রতিষ্ঠানের দক্ষতা বিষয়ে বিবরণ।
- (খ) ২৬/০৬/২০১৪ তারিখের এসএমইএসপিডি সার্কুলার নং-১ এর প্রেক্ষিতে ইতোমধ্যে নির্বাচিত ও স্বীকৃত উদ্যোক্তা উন্নয়ন প্রতিষ্ঠান ও সংগঠন স্বয়ংক্রিয়ভাবে অত্র তহবিলের আওতায়ও স্বীকৃত উদ্যোক্তা উন্নয়ন প্রতিষ্ঠান হিসেবে গণ্য হবে।
- (গ) স্বীকৃত উদ্যোক্তা উন্নয়ন প্রতিষ্ঠান ও সংগঠনকে অনলাইন কিংবা অন্য কোন পন্থায় পরামর্শ প্রদান ব্যবস্থা (Mentorship Program) প্রতিষ্ঠা করতে হবে।
- (ঘ) স্বীকৃত উদ্যোক্তা উন্নয়ন প্রতিষ্ঠান ও সংগঠনকে উদ্যোক্তাদের জন্য ভার্চুয়াল কিংবা ভৌত ইনকিউবেটর স্থাপনের প্রচেষ্টা গ্রহণ করতে হবে।
- (ঙ) স্বীকৃত উদ্যোক্তা উন্নয়ন প্রতিষ্ঠান ও সংগঠনকে তাঁদের কর্তৃক নতুন উদ্যোক্তা হিসেবে নির্বাচিত ও প্রশিক্ষিত অগ্রহী বিনিয়োগ প্রস্তাবকারী নতুন উদ্যোক্তাদের বিনিয়োগ গ্রহণ পরবর্তী ৩ বছর যাবৎ নিবিড় তত্ত্বাবধান কর্মসূচি পরিচালনা করতে হবে। এ সময়ে অন্তত ষাণ্মাসিক ভিত্তিতে রিফ্রেশার্স কোর্স এর আয়োজন করতে হবে। এর মাধ্যমে নতুন উদ্যোক্তাদের ব্যবসায়িক অগ্রগতি জেনে ভবিষ্যৎ কর্মপন্থা সম্পর্কে প্রয়োজনীয় পরামর্শ প্রদান করতে হবে। এসব তত্ত্বাবধান কর্মসূচিতে প্রতিষ্ঠিত ব্যবসায়ীগণকে মেন্টর হিসেবে আমন্ত্রণ জানানো যেতে পারে।

৪.৫ পুনঃঅর্থায়ন সুবিধা গ্রহণকারী অংশগ্রহণকারী প্রতিষ্ঠানসমূহের জন্য প্রণোদনা

এ তহবিলের আওতায় পুনঃঅর্থায়ন গ্রহণকারী অংশগ্রহণকারী প্রতিষ্ঠানসমূহ কর্তৃক অর্থায়িত নতুন উদ্যোক্তাগণকে প্রদত্ত অ-আর্থিক সেবাসমূহের (প্রশিক্ষণ, বিপণন, পরামর্শ সেবা ইত্যাদি) জন্য যুক্তিসঙ্গত ব্যয় Corporate Social Responsibility (CSR) খাতে ব্যয় হিসেবে গণ্য করা যেতে পারে। তবে এ ব্যয় কোনক্রমেই এ খাতে মোট বিনিয়োগের ১% এর বেশি হবে না।

অনুগ্রহপূর্বক প্রাপ্তি স্বীকার করবেন।

আপনাদের বিশ্বস্ত,



(মোঃ মাছুম পাটোয়ারী)

মহাব্যবস্থাপক

ফোন: ৯৫৩০৫০২

কৃষিভিত্তিক শিল্পের তালিকা

- ০১। প্রক্রিয়াজাতকৃত ফলজাত খাদ্য (জ্যাম, জেলি, জুস, আচার, শরবত, সিরাপ, সস ইত্যাদি) উৎপাদনকারী শিল্প;
- ০২। ফল (টমেটো, আম, পেয়ারা, ইক্ষু, কাঁঠাল, লিচু, আনারস, নারিকেল ইত্যাদি) শাক-সবজী, ডাল প্রক্রিয়াকরণ;
- ০৩। ব্রেড এন্ড বিস্কুট, সেমাই, লাচ্ছা, চানাচুর, নুডুলস্ ইত্যাদি প্রস্তুতকরণ;
- ০৪। আটা, ময়দা, সুজি প্রস্তুতকরণ;
- ০৫। মাশরুম ও স্পিরুলিনা প্রক্রিয়াকরণ;
- ০৬। স্টার্চ, গ্লুকোজ, ডেক্সট্রোজ, এবং অন্যান্য স্টার্চ পণ্য উৎপাদনকারী শিল্প;
- ০৭। দুগ্ধ প্রক্রিয়াকরণ (দুধ পাস্তুরিতকরণ, গুড়ো দুধ, আইসক্রিম, কনডেন্সড মিল্ক, মিষ্টি, পনির, ঘি, মাখন, চকোলেট, দধি ইত্যাদি);
- ০৮। আলু থেকে প্রক্রিয়াজাত খাদ্য (চিপস্, পটেটো ফ্লেঞ্চ, স্টার্চ প্রভৃতি) ইত্যাদি উৎপাদনকারী শিল্প;
- ০৯। বিভিন্ন গুড়া মসলা উৎপাদনকারী শিল্প;
- ১০। ভোজ্য তেল পরিশোধন ও হাইড্রোজিনেশন শিল্প;
- ১১। লবণ প্রক্রিয়াজাতকরণ শিল্প;
- ১২। চিংড়ি ও অন্যান্য মাছ প্রক্রিয়াজাতকরণ ও হিমায়িতকরণ;
- ১৩। হারবাল ও ভেষজ কসমেটিক্স প্রস্তুতকারী শিল্প;
- ১৪। ইউনানী, আয়ুর্বেদিক ঔষধ প্রস্তুতকারী শিল্প;
- ১৫। হাঁস, মুরগি ও গবাদি পশু ও মাছ এর জন্য সুষম খাদ্য প্রস্তুতকারী শিল্প;
- ১৬। বীজ প্রক্রিয়াজাতকরণ ও সংরক্ষণ;
- ১৭। পাটজাত দ্রব্য প্রস্তুতকরণ (যেমন দড়ি, সুতা, চট, থলে, কার্পেট, পাটের সেভেল প্রভৃতি);
- ১৮। রেশম বস্ত্র উৎপাদনকারী শিল্প;
- ১৯। কৃষিজাতপণ্য উৎপাদনে সহায়ক যন্ত্রশিল্প স্থাপন, মেরামত প্রভৃতি;
- ২০। চাল, মুড়ি, চিড়া, খৈ ইত্যাদি প্রস্তুতকরণ;
- ২১। সুগন্ধি চাল;
- ২২। চা প্রক্রিয়াকরণ শিল্প;
- ২৩। নারিকেল তেল প্রস্তুতকারী শিল্প (যদি দেশীয় নারিকেল হতে সংগৃহীত Copra ব্যবহার করা হয়);
- ২৪। রাবার টেপ, লাক্সা প্রক্রিয়াজাতকরণ;
- ২৫। কোল্ড স্টোরেজ (কৃষকদের উৎপাদিত খাবার আলু ও বীজ আলু, ফলমূল, শাক-সবজী প্রক্রিয়াজাতকরণ ও সংরক্ষণ);
- ২৬। কাঠ, বাঁশ ও বেতের আসবাব তৈরী/উৎপাদন (কুটির শিল্প ছাড়া);
- ২৭। ফুল সংরক্ষণ ও রপ্তানিকারক প্রতিষ্ঠান;
- ২৮। মাংস প্রক্রিয়াজাতকারী প্রতিষ্ঠান;
- ২৯। জৈব সার, মিশ্র সার, গুটি ইউরিয়া ইত্যাদি তৈরী;
- ৩০। বায়োপেস্টিসাইড, নীম উৎপাদিত পেস্টিসাইড ইত্যাদি তৈরী;
- ৩১। মৌমাছির চাষ/মধু তৈরির প্রকল্প;
- ৩২। রাবারজাত দ্রব্যাদি তৈরির প্রকল্প;
- ৩৩। পার্টিকেল বোর্ড;
- ৩৪। সরিষার তেল প্রস্তুতকারী শিল্প (যদি দেশীয় সরিষা ব্যবহার করা হয়);
- ৩৫। ধানের তুষ, পোল্ট্রি ও গরুর গোবর থেকে বায়োগ্যাস ও বিদ্যুৎ উৎপাদন প্রকল্প;
- ৩৬। চালের কুঁড়া থেকে ভোজ্য তেল উৎপাদন শিল্প;
- ৩৭। পোল্ট্রি ও ডেইরি শিল্প।